



## Komunikado di prensa

22 di febrüari 2024

### **Cft: "Duna aprobashon di presupuesto 2024 prioridat"**

**Philipsburg – For di 2010, Sint Maarten no a logra niun aña aprobá su presupuesto na tempu. E aña aki, e situashon ta meskos. Debí na esei, ta falta un marko pa por hasi gastunan nobo i hasi invershonnan nobo. P'esei, Cft ta urgi gobièrnu pa yega mas pronto posibel na un presupuesto aprobá pa 2024.**

Durante niun di e añanan for di e reforma estatal di 2010, Sint Maarten no a logra stipulá su presupuesto promé ku 15 di desèmber di e aña presupuestario anterior. Cft tin algun aña ta ekspresá su preokupashon tokante di e retraso struktural ku tin den e entrega di e presupuesto aprobá, pasobra e presupuesto ta forma e base pa e outorisashon pa gasta fondonan i hasi e invershonnan nesario. Ta di sumo importansia pa Sint Maarten implementá e plannan di enfoke ku a elaborá kaba pa mehorá e proseso presupuestario. Siguiendo e konseho di Cft, Konseho di Minister di Reino a pidi Sint Maarten pa aprobá e presupuesto 2024 mas pronto posibel, pero en todo kaso pa mas tardá riba 31 di mart 2024.

#### **Kuido i fondonan sosial**

Na final di 2022, e défisit kumulativo di e fondonan di kuido tabata ANG 274 mion. Ta antisipá ku e défisit aki lo sigui krese e añanan benidero. Sint Maarten ta trahando riba reformanan pa baha e défisit. Den e marko aki, lo por enfoká riba prevenshon i un kambio di e kuido i fondonan aktual for di kuido sekundario na kuido primario. Asina por evitá ku den futuro, pashèntnan mester di kuido sekundario mas kostoso. Reformanan ta krusial pa garantisá e pago di kuido i pa sigurá e aksesu na kuido. Cft repetidamente a ekspresá su preokupashonnan tokante di e implementashon debido di reformanan. E echo ku ta posponé reformanan ta indusí na un situashon insostenibel ku konsekuensianan sumamente grandi pa e presupuesto di e pais.

Banda di esei, Cft tin preokupashon tokante di e previshonnan sosial, partikularmente tokante di e penshun di behes (AOV). Debí na e echo ku e populashon ta enbehesé kada bes mas, den e añanan benidero e kantidat di hende grandi ku derecho riba un pago di penshun lo oumentá hopi. Ta antisipá ku na 2029, e ingresonan di prima lo no ta suficiente pa por kubri e pagonan di AOV. Cft ta konsehá e gobièrnu pa tuma medida pa pèrkurá ku e previshonnan di behes ta keda pagabel.

#### **Invershonnan**

Na 2023, Sint Maarten a presupuestá ANG 90 mion na invershon. Pa parti di esakinan, Sint Maarten a hasi un fianza. Un parti konsiderabel di e invershonnan aki no a keda ehekutá na 2023, enkambio lo realisá nan e aña aki. Cft a pidi Sint Maarten pa tene e dato aki na kuenta na momentu ku ta elaborá e presupuesto pa 2024. Ademas, Cft a pidi Sint Maarten pa inkluí un agenda di invershon multianual, pa asina por tene kuenta ku e fondonan i e kapasidat di implementashon disponibel.

[Fin di komunikado di prensa]



**Potrèt: Cft**

**Deskripsjon di potrèt:** Cft repetidamente a ekspresá su preokupashonnan tokante di e implementashon debido di reformanan.

**Nota pa e redakshon - no publiká**

Persona di kontakto di Cft:

Sekretariado di Kolegionan di supervishon finansiero  
Telefòn +5999 461-9081 / +5999 461-9082 / +5999 461-9084  
Koreo elektróniko info@cft.cw  
Wèpsait www.cft.cw

**Kontaktonan di prensa:**

Jefka Alberto  
Telefòn +5999 512-6861